

欽定剿平三省邪匪方略

欽定剿平三省邪匪方略正編卷七十一

戊午年

五月初二日

乙丑

宜綿德楞泰明亮額勒登保奏

言阮正通等賊匪退回槐樹關屯紮經典肇柯
藩帶兵追剿遂分竄於范家坪彌勒院等處其
勢直趨西北興肇等恐賊匪竄入棧道派兵五
百名繞入褒城防守與駐守雞頭關之鎮臣索
費英阿相爲犄角保護北棧又派遊擊額爾畢

濟呼帶兵七百名防守沔縣大安驛遇共竄入
南棧之路與肇柯藩各帶兵一千名南赴漢中
江岸分設埋伏以爲半渡掩擊之計另派兵數
百名多張旗幟虛作尾追聲勢賊匪前隊果於
十二日夜間潛至褒城窺伺經署知縣汪銓早
爲準備城上連放鎗礮四面伏兵齊起追殺賊
匪二百餘人生擒九名餘匪由景家塘南竄南

鄭縣知縣何振權帶鄉勇五百名攔頭堵截殺賊甚多其時大夥賊匪俱向長寨奔竄守卡外委王忠帶領兵勇迎敵道員文需叅將瑪靈阿帶鄉勇二千名自府城起剏何振權亦追賊踵至三面夾攻殺賊六百餘人救出城固洋縣被擄難民男婦五百餘名口賊匪遂竄至新街江邊在上流淺處泅水過江與肇柯藩所伏之兵

齊出前後夾擊詎賊匪一面拒戰一面仍復淌
渡其善泅者皆牽帶多人捨死搶渡官兵遠用
鎗礮近用箭射雖淹斃賊匪甚多而過江者仍
復不少把總顧林首先衝入賊陣受傷陣亡兵
勇繼之賊匪始各潰竄我兵正在痛剿北面忽
有賊匪二千餘人向南直撲文需瑪靈阿急率
鄉勇同城防堵賊匪恃有接應復聚向江岸我

兵奮殺益力屍橫遍野生擒賊目何仲茂等一

百二十七名賊匪乃合夥折回東竄與肇柯藩

急率官兵躡蹤追擊兩晝夜直抵石泉

臣

宜綿

前派鎮臣長春山木子河順江岸西去

臣

明亮

同圖桑阿帶索倫兵五百名由大道迎擊

臣

宜

綿督率關騰烏爾圖那遜等由北山抄截三路

楚圍正與賊遇當將二千餘賊殲戮無遺把總

顏希章外委金海宋福皆以力戰陣亡其在新
街渡江之賊亦約有二千餘人十三日竄至周
家坪知縣何振權帶領鄉勇追擊殺死騎馬賊
目一名賊匪二百餘人又調青石關千旗山兩
路鄉勇於馬仙壩等處埋伏十四日賊匪從周
家坪南竄伏勇齊起殺死後股賊匪一百餘名
餘匪翻孫家嶺竄至紅廟塘牟家壩一帶入四

川之通江南江二縣境內至高均德等一股賊
匪自與李全張添倫合夥之後經臣宜綿等在

漢陰截擊折回東竄臣額勒登保由古木嶺二

郎廟馳抵獅子溝臣德楞泰由興安大道馳抵

兩河關探知賊匪在大仁河一帶欲出茅坪東

竄經臣德楞泰帶兵迎截斬獲四百餘名賊遂

由大仁河上流翻山向蔡家坪而去擒獲張九

銀等四十二名訊問此股賊匪係高均德張添

倫尙有八九千人次日臣德楞泰復由青銅關

松樹垭進剿賊匪佔據蔡家坪右山包臣德楞

泰督同賽冲阿阿哈保等帶兵搶上該匪捨命

奔逃我兵乘勢壓下殺賊一千五百餘人臣額

勒登保偵得一股賊匪在大仁河紫溪嶺等處

藏伏隨督同綸布春慶溥楊遇春等由獅子溝

至紫溪嶺賊匪正冒雨翻嶺我兵奮力趕擊賊
匪亡命下嶺滾馬跌斃者甚多餘賊分竄蔡家
坪等處十六日分兵一股從紙坊溝出蔡家坪
因見溝內偪隘恐爲賊人所阻上額勒登保帶
兵徑上左手大山衝下該匪等當時潰亂溝內
之兵亦到共斬戮一千餘人生擒許得信等六
十三名內楊鳳一名係執旗頭目據供高均德

等一股經官兵在青銅關剿敗已向茅坪等處
竄逸此股係李全所帶約有五千餘人當將該
犯等分別凌遲正法

臣

德楞泰額勒登保於十

七日晚均至茅坪會合查阮正通等股匪過江
者尙有二千餘人已入川境與肇柯藩旣將折
回東竄一股剿淨自應趕回漢中渡江追殺緣

現奉

諭旨令

臣

額勒登保與肇帶兵趕赴湖北協同景安

剿辦川匪伏思湖北現在需兵緊急官兵等應

從漢江順流而下即可速抵襄陽但江流迅駛

馬匹不能載渡今

臣

額勒登保酌帶索倫吉林

兵四百名漢兵六百餘名與肇所帶馬兵一千

名內有分令綸布春等帶領由平利竹谿一帶

趕至房縣均州等處其餘滿漢步兵額勒登保

興肇卽於二十三、四兩日由興安坐船而下計
可到在馬兵之前沿途當偵探賊蹤相機籌辦
惟是柯藩所帶兵丁除分防褒城及沔縣外所
餘僅一千名若令入川追剿阮正通等未免單
弱而高均德等股賊匪又皆河南湖北之人每
欲乘隙逃往楚豫因截殺緊急未得渡洵陽大
河今臣額勒登保分兵赴楚東面稍覺空虛臣

宜綿卽飭柯藩將原帶之兵趕赴茅坪軍營聽

臣德楞泰調遣

臣

宜綿明亮等由漢陰入五郎

從西夾擊秦承恩王文雄在北路嚴加堵禦其
阮正通一股賊匪已飛咨勒保派撥鎮將截剿
並咨調永德將防守北棧之兵移駐漢中督同
文需等嚴密防堵勿令竄逸奏入

上命軍機大臣傳諭勒保宜綿德楞泰景安秦承恩

日宜綿等連日打仗在景家塘長寨新街等處殲
賊不下三千餘名惟首逆仍未擒獲不足爲功且
阮正通一股本由川省竄入陝境今復任其折竄
回川亦難辭疎防之咎宜綿等均著傳旨嚴行申
飭此次陣亡之把總顧林顏希章外委金海宋福
俱著咨部加等議卹再據稱李全一股係與高均
德張添倫合夥自興陰折回東竄是該匪仍在陝

境與秦承恩昨奏不符究竟李全在陝在川卽著
宜綿等查明具奏柯藩現經宜綿調回茅坪防堵
則逃入川境之阮正通一股卽著勒保酌派將領
帶兵截擊並飭地方官一體堵剿毋任又與川匪
會合至高均德股匪與李全張添倫合夥經官兵
分路截剿賊首又復東竄茅坪地方現在德楞泰
等帶領勁旅馳擊而東南兩面已派柯藩在彼防

堵北面有秦承恩等帶兵迎擊宜綿等又由五郎
一路進剿正可四面兜圍務將此數股賊首按名
擒獲再行赴川幫同勒保協剿以期稍贖前愆

初六日已景安高杞奏言張漢潮一股賊匪經

臣等屢次剿敗後現已折竄武安鎮屯聚查此
股賊衆上年曾竄入楚境道路皆所熟悉且通
股尙有二萬餘人每以分合奔竄爲牽綴官兵

之計而官兵僅有二千餘名勢難分投截剿

臣

等再三籌酌惟有嚴防漢江並保護下游完善

之區仍逼入西南山險以便聚而殲洗因思荆

門爲武漢扼要之地而沙市卽在郡南十五里

地方繁庶設被分股滋擾官兵卽有顧此失彼

之虞是以

臣

等於調來湖南官兵二千名內撥

出一千二百名分駐荆門沙市二處其餘八百

名已陸續來營合之原有之兵計共三千餘名

臣等卽於十六日由北路襄陽一帶繞出江岸

抄截十七日行抵宜城縣適賊匪已由武安小

河一帶竄聚該縣城外正在蜂擁圍城不期官

兵猝至當經擊斃一百餘名賊猶向前直撲旋

經馬隊衝擊始由東面狂奔官兵緊躡追擊沿

途又截殺數十名生擒賊目鄭玉楊在寧二名

賊匪十二名餘匪由新店鹿陽一帶奔竄當提
鄭玉等嚴訊據供賊匪被官兵晝夜抄截疲乏
已極張漢潮與衆賊目商議今日想攻奪縣城
暫時休息不料又被官兵擊敗當將該犯等正
法臣等隨鼓勵將士漏夜趲行於十九日行至
荊門之石橋見賊匪屯聚左手山頂正擬設法
進攻遙聞鎗礮不絕隨據探報賊匪先分一半

往攻荊門州城以一半留駐石橋抵敵官兵狡

詐已極

臣

等若令官兵全行赴援賊必躡我之

後轉墮奸計當於對山紮住故作進攻之狀一

面派令副將廣福叅將董寧川遊擊曹星挑帶

健兵一千五百名倍道赴援賊匪自辰至午攻

城不得遂將田野已割之麥各持一捆堆積城

下欲圖一擁而上適廣福等帶兵赶到賊匪一

見卽向攻撲廣福等用礮轟擊連斃百數十名
時城內兵勇亦出城助戰賊衆始由皮家集一
帶竄逸當時擒獲王友倫等二十餘名訊明正
法其石橋屯聚之賊亦於是夜竄至皮家集仍
復合爲一股直奔沿江石牌沙洋一帶其勢將
直赴下游闖入武漢臣等當卽商定仍各分兵
一半臣高杞由石牌自上下壓臣景安抄赴沙

洋由下堦擊賊匪竄至沙洋見沿江船隻淨盡

卽在附近民房搜取木梯板片等物紮筏多架

希圖併力搶渡因_臣等預札河南鎮臣張文奇

田永桐道員完顏岱協同本省道府俱在對岸

督率兵勇堵守甚嚴賊匪正在相持適_臣等兩

路官兵先後抄及賊卽分股仍由皮家集向南

奔竄_臣等查皮家集之東南係十迴橋後港西

南係建陽驛四方舖均與荊州府運界是以仍

分兩路

臣

景安率同廣福叅將福寧等帶兵一

千數百名繞道抄赴建陽驛以南之丁家集先

在兩旁樹林中埋伏

臣

高杞率同董寧川遊擊

王愷等帶兵一千五百名由十迴橋一路抄至

後港該處有小河一道賊匪正在搶渡經官兵

開放大礮轟斃二百餘人賊仍由十迴橋竄往

建陽驛直奔荊州大路而來行至丁家集伏兵
突出鎗礮齊發又礮斃賊匪數百人賊人未及
防備向西捨命狂奔時臣高杞由東北一帶抄
截而至遂合兵追殺二十餘里生擒賊目陳洪
周董光國二名並賊匪鄭敖等六十八名其被
裹良民婦女乘機逃出者一二千人餘賊遁往
當陽之積山寺地方時值大雨如注又兼官兵

連日窮追疲乏是以卽在積山寺以東之四方
舖扼要紮營暫養兵力隨提陳洪周等訊無要
供概予駢誅其逃出民人查係宜城鍾祥荊門
一帶新裹良民當卽逐加撫慰并酌給路費令
其各歸安業查積山寺地方與荊州路路可通
該郡有海興阿成德督率滿兵防守沙市亦有
副將豆霽帶兵數百名協同鄉勇守禦臣等一

面飛囑加謹防範勿令闖入一面仍於積山寺
東北一帶旋剿旋逼以期併歸山險庶剿辦易
於得手惟賊多兵少實不敷各路兜截因又於
鄖陽所屬挑募健勇二千名隨同協剿以期迅
速蕲事再提督文圖傷漸平復現今駐紮漢江
東岸督率防堵並雋義勇數萬分布沿江一帶
聲威甚壯且大汛將臨水勢日見增長賊匪斷

難偷渡堪以仰慰

宸厪

景安高杞又奏言接准英善福寧來咨以川省
添調滇黔官兵協剿需用軍糧甚多囑於湖南
省查明各屬約可協濟軍糧若干卽飭運供等
情_臣等查湖南省原存截剩漕米八萬餘石係
留爲苗疆官兵口糧之需爲數較多尙可酌撥

第南省水道距川較遠誠恐緩不及濟是以先
在荊州滿營兵糧項下撥米三萬石飭令僱船
委員就近解赴川省夔州府接收轉運以期迅
速_臣等仍咨會姜晟於南省截漕項下撥出三
萬石解交荊州府歸還滿營兵糧

同日額勒登保與肇奏言_臣等帶領步兵由興

安坐船順流而下自入楚境後察看鄖陽府均

州一帶沿江均有卡隘防護並有將軍成德道
員恒慶督率鄉勇駐紮防守民情甚屬寧貼四
月二十九日行抵襄陽接見按察使張長庚詢
問賊情據稱日聚日多約有三三萬人竄往荆
門州一帶景安現在追剿查荊門州距襄陽府
祇三百餘里臣等自應儼程前進惟所有馬兵
先交綸布春等帶領由二竹一帶行走計程尙

集賢堂書目之卷之二
需五六日始抵襄陽臣等一面差人迎催一面

卽督率原帶步兵八百餘名馳赴荆門州與景
安會合剿辦均奏入

上命軍機大臣傳諭額勒登保與肇景安曰景安等
連日抄擊賊匪帶兵不過三千餘名以少擊衆不
使賊攻擾城池偷渡漢江實屬出力可嘉現在該
督等在當陽積山寺以東扼要堵截旋剿旋逼賊

匪日益窮蹙而本日額勒登保與肇其奏已於西
月二十九日前抵襄陽即先帶步兵八百名趕赴
景安軍營並飛催綸布春等帶領馬兵償程趕赴
此刻自早已到齊景安等當屢勝之後又得此勁
兵協剿務當趁賊匪屯聚之時併力兜截將賊首
劉成棟張漢潮擒獲殲盡餘匪以副委任至川省
現在剿賊緊急之際軍糧最關緊要景安能設法

籌運業經撥米三萬石解赴夔州俾得早資接濟
所辦亦屬妥協

初十日

癸酉

勒保奏言查王三槐等前從儀隴境

內分竄營山巴州邊界當經分派鎮將併力截

回該首逆等遂由渠縣一路折竄該處亦經

臣

預派總兵富爾賽副將富森等帶領兵勇馳往

攔截

臣

復督率各兵從渠縣取道進發十九日

行抵大埡口據報各股賊匪由渠達交界之楊

家壩清河場一路焚掠攻撲永興場糧臺典史

楊堂率領團勇守禦因衆寡不敵當被戕害賊

匪卽向三溪口奔竄適富爾賽等帶兵迎截斃

賊三百餘名生擒潘九和等二十餘名該匪遂

分股折由杜市街木頭市等處竄赴大竹縣境

查該處毗連渠縣達州梁山墊江各州縣路徑

紛歧賊蹤靡定必須分投布置方可相機迎擊

仍派富爾賽等帶領兵勇卽從三溪口跟蹤追

剿臣督同富成七十五百祥雷仁等由渠縣之

卷硐門一帶直赴大竹賊匪正屯聚該縣橫亘

五六十里分夥直逼城池知縣張位中與教諭

馮灼文率勇堵截斃賊無數賊匪卽於離城數

里之賀家梁邱家壩盤踞不退二十三日五更

臣

督同富成七十五等帶兵由迴龍場一帶直

抄賀家梁等處賊匪後路該匪正在攻撲縣城

不意官兵驟至立形慌亂我兵乘勢剿殺斃賊

五六百名該令亦率同紳士帶領鄉勇分路追

殺匪衆退至黃泥壩月華坪屯紮

臣

督同富成

七十五等連夜分兵前進賊匪又卽相率奔逃

我兵沿途追殺八九百名生擒夏登才等一百

四十六名卽行正法追趕至石橋舖地方賊匪
復分兩股向梁山墊江一帶竄逸並據探報墊
江彭家溝地方有新起賊匪一千餘人與王三
槐接應合夥現經臣分派副都統七十五帶兵
一路馳赴墊江富成帶兵一路馳赴梁山臣同
明興帶領百祥等由梁墊交界中路進發察看
賊匪由何處折竄卽由何處截擊惟七十五一

路兵力較單且有新起賊匪是以復派穆克登
阿酌帶兵勇隨後策應至連日打仗千總宋國
富謝兆熊把總周永泰三員均因殺賊陣亡其
餘傷亡兵勇另行查明咨部

勒保又奏言查西鄉通江接壤之三花灘鉄溪
河等處先有餘匪往來滋擾經臣節飭原任總

兵楊秀署總兵田有成在川陝邊界截擊嗣據

南江通江各縣稟報毗連陝省之分水嶺空山壩等處均有賊匪出沒焚掠當經知會陝省各縣彼此設法堵禦茲據川北道李鈺稟報陝省賊匪分爲三路一入巴州之羅家壩一入南江之沙河子一入南江之長池壩現派各卡鄉勇分投堵截並據漢興道文需稟報賊匪既正通李全等全夥俱乘間由南鄭竄入川省南江縣

境_臣查川省與陝界毗連之處惟太平一縣現

有楊秀帶兵駐劄其餘本無兵力防範而通巴

南江各邑均曾被賊蹂躪脩禦更爲費力刻下

如開州坪老木園孫家梁三處賊匪負嵎屯踞

急切未就殲除在在均形牽綴並據夔州府稟

報前竄楚省之賊又轉回保康一帶如復折入

夔巫亦關緊要是目下川省軍務實在頭緒紛

繁且王三槐等各股賊匪勢已窮蹙設又有竄
匪接應則辦理更爲不易

臣

現飭臬司先福川

北道李鉉督率地方官團練鄉勇務將闖入賊

匪設法堵禦並知會興肇柯藩等趕緊督兵追

剿兩面截擊俟王三槐等各股賊匪一就殲除

臣

酌量何處緊急再行分兵前往至提督慶成

前在孫家梁打仗腿受鎗傷較重經

臣

囑令暫

赴順慶府城調養茲奉

諭旨以一時不能就痊卽令緩程回京調攝

臣遵卽

轉行去後據該提督覆稱月餘以來傷痕轉劇

第念軍務未竣若遽行回京問心實切不安

臣

查該提督打仗殺賊本屬奮勇惟因腿受鎗傷

急切驟難痊愈應令緩程進京以副

聖慈體恤周詳至意

勒保又奏言臣欽奉

諭旨以川省剿賊州縣中間劉清官聲甚好令臣查

明據實保奏並將此外文武員弁詳細察覈分

別舉劾等因臣查南充縣知縣劉清平日居官

辦事深得民心自教匪滋事以來節次帶勇殺

賊甚爲奮往賊匪亦稱爲清官衆口如一臣前

因廣元爲北棧門戶是以委令署理縣篆可否

仰懇

天恩將該員以同知直隸州用並請

賞戴花翎又夔州府知府張至齡辦事勤能去年剿辦所屬大寧之九龍池等處邪匪殺賊極多嗣因各屬賊匪蠢動軍務殷繁該守往來堵剿料理軍儲毫無貽悞洵爲超衆出力又開縣典史張陳鉉每遇賊匪擾及縣治卽親帶鄉勇隨時

擊退士民莫不感服臣不敢壅于

上聞合無仰懇

聖恩將知府張至幹

賞戴花翎典史張陳鋹以縣丞鹽大使陞用庶各知

所激勸實于軍務地方均有裨益其餘文武員

弁如有玩悞軍務者自當隨時劾叅斷不敢稍

有瞻徇均奏入

上命軍機大臣傳諭勒保宜綿德楞泰景安曰此次
勒保督率鎮將等分路追剿在渠縣大竹地方殲
賊不及二千並未擒一首逆殊不愜意其所奏陝
省賊匪闖入南江一帶亦早經宜綿等奏過此時
王三槐等既不能與羅其清等合夥且經官兵屢
次抄截分向梁山墊江奔逸勒保惟當趁此股賊
匪窮蹙之時設法兜擒絕其竄合去路卽有新起

匪徒亦無從接應自必紛紛潰散並可順道察探
各股賊勢緩急夥黨多寡剿淨一處再辦一處不
可心忙意亂以致調度失宜其彭家溝新起賊匪
已歸入王三槐一夥勒保現派富成七十五前往
剿辦富成打仗素稱勇往務將此股新起賊衆全
數撲滅卽自行專摺具奏此外冉文儔羅其清股
匪有惠齡等在彼剿辦開州坪老木園賊匪有六

十七德齡等在彼剿辦務當各剿各股擒獲首逆
勿再遲延干咎所有打仗陣亡之千總宋國富等
及保護糧臺被害之典史楊堂均着咨部加等議
卹至景安等所辦陝省之賊現據勒保奏稱已轉
回保康一帶想被官兵追剿緊急又思折竄夔巫
景安等屢得勝仗今又有額勒登保等到彼協剿
聲勢更壯務將張漢潮等截住就地擒獲不可驅

令入川卽爲了事至川省剿賊出力聲名素好之
知府張至幹着賞戴花翎知縣劉清着以同知直
隸州陞用並賞戴花翎典史張陳欽着以縣丞塩
大使陞用以示獎勵

十二日乙亥宜綿德楞泰明亮奏言查額勒登保

遵

旨帶兵馳赴湖北德楞泰親率巴圖魯侍衛等由

梅花舖溝口直入剿賊另派溫春慶溥等由左手山梁壓下賊匪埋伏齊起悉力抗拒

臣德楞

泰策馬先進滿漢兵丁奮勇爭先溫春等又從

高下壓殺賊八百餘人賊不能支亟翻南面山

梁欲由兩河關竄至湖北當派溫春等繞赴該

處堵截適

臣

宜綿派柯藩帶兵一千名前來協

剿亦抵該處賊匪探知前有官兵又以

臣

德楞

泰等緊躡其後遂改道由越河竄至五郎之兩

河口臣宜綿明亮由漢陰帶兵適至迎頭截擊

殺死前股賊匪四百餘名賊匪奔同官兵乘勝

追擊趕至周家坎臣明亮射死執旗賊目一名

兵弁呐喊齊進又殺賊三百餘名其後股賊匪

遂改由文家廟四海坪一帶竄至江口臣德楞

泰帶兵繞至五郎城遏其北竄之路派阿哈保

達音泰等由東川至小川躡蹤緊追賊匪一見

官兵四散奔逸臣明亮自周家坎趕至三面夾

擊殲斃賊匪九百餘人餘匪向四畝地三河口

一帶分竄拏獲賊犯供稱高均德等總要引官

兵西來乘空竄入楚豫今被剿緊急不能折回

東竄想卽由洋縣漢中一帶回川臣等查夾嶺

秦嶺等處經秦承恩派令兵勇嚴堵賊匪不能

北竄必由焦溪河南至洋縣

臣

明亮卽趕至兩

河口同

臣

宜綿帶兵翻山由大河壩前至洋縣

遏其去路

臣

德楞泰仍分兵兩路一由琵琶嶺

金雞河一由廟溝進剿伏思高均德李全張添

倫等皆河南湖北人本處從逆者固多而裹脅

川陝之人亦不爲少新舊互疑漸不相安

臣

宜

綿前入陝境偵知其情卽多寫簡明告示遍爲

曉諭並於所獲賊匪內察其真心悔罪人尙明白者厚加賞賚卽令持入賊夥中密爲反間旬日以來投首者無數皆經慰諭犒賞飭令回籍亦有投棄器械自行散歸經卡隘盤獲送案者訊問確實亦俱釋放約計解散賊黨不下二千餘人惟原帶河南湖北之人同惡旣久自知必死合力抗拒現在高均德一股不過二千餘人

李全張添倫等亦不過六七千人總欲乘官兵
偶有不脩卽分股折回楚豫臣等分兵佈置惟
有隨時隨地相機截剿一經得手卽可合圍聚
擊

同日秦承恩奏言臣因賊匪高均德等竄至五

郎一帶當與王文雄自郿縣馳回盩厔探蹤堵
剿據差弁探報賊匪一股約一千數百人於四

月二十九日由盤屋南鄉之小藍溝竄至樓丹

坪該處正北可由西駱峪竄出平地正西可由

二郎壩斜趨寶雞之號川

臣

查西駱峪綿長二

百餘里峪東由寬坪至辛口峪一路近已被水

衝斷惟峪西由八斗河直通泥峪路極陡險若

能誘賊深入祇須前後設伏堵截必可全數殲

除

臣

先卽飛札永德在號川一帶堵住西路一

而令王文雄帶領舊勇兵五百名由西駱峪入
口埋伏另派叅將鍾岳帶兵五百名入泥峪埋
伏一面密札派守厚畛子之署守備魏廷拔酌
派鄉勇在板房子一帶防守俟賊過盡後卽於
該處截住去路臣仍卽督率兵勇隨後接應五
月初三日王文雄探知賊匪已過板房子卽督
率叅將鮑貴等奮勇迎擊斃賊三百餘人賊衆

逃回舊路已經截斷遂由泥峪一路奔逸鍾岳等伏兵齊起王文雄亦帶兵趕到兩面夾擊又殲斃五百餘人滾崖跌斃者一百餘人生擒賊目趙添培等三十四名內有本省被裹民人一百餘名一見官兵卽俱棄矛投出當將此股全行剿淨訊據趙添培供賊首高均德等俱係河南湖北人總想逃回本省因被德大人屢次剿

敗不能東去仍舊折回五郎高均德現帶前股
向南逃走我等後股一千餘人纔到小藍溝聽
見官兵起來想進北山逃走不料俱被截殺隨
將該犯等一併正法其被賊裹脅割去髮辮訊
未隨同打仗者概予省釋並遍貼告示曉諭俾
脅從之衆得以聞風解散現據探報高均德等
俱竄至洋縣地方德楞泰帶領勁旅已由五郎

分道兜剿宜綿明亮等大兵亦由石泉先赴南路堵截臣因整屋郿縣一帶係賊往來折竄之路現與王文雄暫在山內扼要堵截如賊匪日益南趨北路無可顧慮卽當帶兵入棧前赴漢中會同剿辦均奏入

上命軍機大臣傳諭勒保宜綿德楞泰景安秦承恩曰宜綿等剿辦高均德股匪旬日未據奏報及本

日奏到剿賊情形仍未拏獲一名首逆雖殲賊二千餘人殊不愜意高均德等自阮正通折回川境後其勢已孤宜綿等遷延多日仍任賊匪竄至江口洋縣一帶實屬無能現在高均德李全等兩股賊匪其沿途裹脅川陝民人業經紛紛投出是真正匪衆計祇不滿萬人而官兵現有數萬加以吉林黑龍江勁旅數倍於賊豈尙不敷剿辦但賊首

雖分而官兵正須併力一處或先將高均德拏獲
再行剿辦李全等如官兵並指所到通倭李全等
一股卽先將李全張添倫拏獲再剿高均德一股
以期兵力厚集一處迅速成功至秦承恩所剿整
厓山內之賊亦不過敗竄餘匪仍未將首逆高均
德等拏獲殊屬無謂該撫與王文雄務須探明賊
蹤卽赴漢中一帶併力奮擊勿再遷延干咎

同日

上諭內閣曰陝省地方前因川楚賊匪竄入滋擾業經蠲賑兼施但念該省自上年秋冬以後各該州縣間有被賊蹂躪之區村民致妨耕作其隣近地方轉餉團練幫同堵截小民等急公趨事不免廢時失業情殊可憫所有藍田南鄭寧羌城固洋縣褒城沔縣白河石泉等九州縣曾被賊匪蹂躪村

莊未完嘉慶二年地丁鹽課等項錢糧着加恩全
行豁免其實雞岐山扶風郿縣南鄭留壩寧羗城
固洋縣西鄉褒城沔縣安康漢陰洵陽白河紫陽
平利石泉商州雒南鎮安山陽商南武功等二十
五廳州縣應徵本年地丁正耗並鹽課等項錢糧
又咸寧長安五郎鄠縣盤屋寶雞岐山扶風郿縣
武功等十廳縣未完嘉慶二年地丁鹽課等項錢

糧着查明被賊蹂躪村莊全行豁免餘俱着緩至
本年麥熟後徵收又南鄭寧羗城固洋縣西鄉沔
縣安康漢陰洵陽白河平利石泉商州雒南鎮安
山陽商南藍田臨潼涇陽咸陽三原醴泉鳳翔隴
州柝陽鳳縣畧陽大荔華州華陰韓城澄城蒲城
白水邠州長武淳化乾州永壽咸寧長安寶雞岐
山扶風郿縣武功等四十七廳州縣應行帶徵嘉

慶元年地丁正耗鹽課等項錢糧着加恩一併緩
至本年麥熟後徵收該撫務須督飭所屬實心經
理以副朕軫念窮簷有加無已至意

欽定剿平三省邪匪方畧正編卷七十二

戊午年

五月十六日

巳卯

景安額勒登保與肇高杞奏言

賊匪張漢潮等前經

臣

景安高杞節次截剿逼

歸當陽之積山寺五月初一二等日賊又分出

數股俱向西北一帶焚燒而大駭仍在積山寺

負嵎抗拒察看賊情欲誘官兵前赴西北攔截

即可直奔荆郡圖掠沙市查該郡雖有海興阿

等督率滿兵防守沙市亦有湖南官兵在彼防

堵第兵力甚單

臣

景安高杞一面派撥馬隊抄

往西北一帶截殺一面飭令副將廣福叅將董

寧川等挑帶健勇一千名星夜馳赴荆郡擇要

截剿初三日夜半時賊果全夥直奔荆郡行至

裁縫店地方經廣福等帶兵截住賊匪直前攻

撲正在相持間適

臣

景安高杞帶兵趕到兩路

夾擊殲賊多名賊卽從旁路藤子店川心店等處遁往當陽之河溶清溪河一帶

臣

景安高相

分帶官兵緊蹙抄截賊匪復從烟墩集直趨荆

門州適

臣

額勒登保興肇於初六日趕到該州

因綸布春所帶馬隊官兵尙未能到止帶步兵

數百名隨查知城內尙有留防之湖南兵六百

名卽一併帶領密赴前面山後埋伏俟賊竄近

一擁齊出鎗礮並發擊斃賊匪三四百名賊人

甚形驚駭時

臣

景安高杞又從東南一帶抄截

而來賊匪愈覺倉惶失措卽從旁路分股狂奔

遁入南漳山險

一等遂會合一處公同商酌將

留防荆門沙市官兵一千二百名一併調歸大

營合之

臣

額勒登保帶來之兵共有五千餘名

雖賊夥尙有二萬餘究係烏合之衆且此內裹

脅居多似可易於解散_臣等惟有分投兜擊速擒首逆奏入

上命軍機大臣傳諭勒保景安曰景安等截剿賊匪不使竄擾荊州所辦甚好現在景安及額勒登保等所帶兵丁祇有五千餘名而賊數尙有二萬計綸布春所帶馬隊官兵此時自己接續到營賊匪寃係烏合之衆且已逼入山內正可聚而殲洗並

當剿撫兼施照從前景安所辦如有自行投出者
不追咎其既往概行收恤妥爲安頓賊黷自必紛
紛解散若能迅將賊首拏獲其餘黨與無難悉就
殲除勉之

二十日奏未奏勒保奏言王三槐等各股賊匪經臣

督兵痛剿遂分向梁墊兩路竄逸當卽分派富
成七十二馳往剿辦復派穆克登阿在後策應

臣卽由梁墊交界中路進發嗣據探報彭家溝

新起之賊已與王三槐合夥路過高灘地方署

縣丞李晨率勇堵截猝被戕害臣查梁墊一帶

界連忠州涪州酆都長壽恐該匪等沿江偷渡

又致逼入楚境隨一面飛飭忠州等處將船隻

盡數撤赴南岸並令多派兵勇防禦一面督催

富成七十五帶領官兵隨機截擊臣同明興帶

領總兵百祥等馳赴梁山縣界葫蘆山地方駐
劄並分派副將孫大猷遊擊哈三泰知府銜署
梁山縣知縣方積各帶兵勇於觀音巖涼風埡
等處嚴密布置以備賊匪折竄四月二十八日
富成一路官兵進抵梁山所屬之老鷹場適徐
添德樊人傑等合夥竄至我兵奮勇截擊斃賊
極多二十九初一等日復於馬家場石竹坪兩

次殺賊四五百名初三日賊匪繞至忠州邊界
經署牧王垂重率勇截剿賊卽折回復經富成
督兵接仗斃賊七百餘名現由拔山寺一帶奔
竄其七十五一路於二十九日至墊江所屬之
界尺場擒獲前隊賊匪五十餘人訊知王三槐
等大夥均在趙家寺屯踞七十五卽連夜催兵
前進穆克登阿亦卽趕到初二三等口從趙家

寺董家場等處節次打仗殺賊六百餘名生擒
一百三十餘名匪衆直撲涪州之關口山地方
知州李培恒帶領鄉勇當時擊退大夥仍向李
家寺奔竄查兩路賊匪疊被官兵剿敗狂奔因
沿途均有備禦不能闌入楚境其勢必由梁山
邊界折竄開萬一帶冀與開州坪賊匪合夥聯
絡初三四等日賊匪竄至曲水地方並分股在

觀音巖石梯關等處肆擾經臣派明興百祥帶

兵馳擊沿途斬獲甚衆其觀音巖石梯關等處

初三四等日均有賊匪竄至復經哈三泰方積

等分帶兵勇痛加剿殺斬獲亦多惟賊勢過於

散漫甫經剿散一股又有一股接踵而至初五

日據報大駭賊匪逼入太平壩地方當卽酌派

將領於百家場銀河橋分兵兩翼佔住山梁臣

督率官兵由葫蘆山迎截三面下壓斃賊一千
餘人生擒五百六十八名餘匪捨命奪路從開
萬交界處所奔逸拿獲活賊內訊有徐添德名
下賊目高相朝李如倫二名王三槐名下賊目
曾士俊一名卽與各犯分別凌遲正法臣現飭
各路官兵卽日分投進剿並飛飭六十七富森
布等先將開州坪之賊實力圍堵毋任乘間接

應其新調滇黔官兵到營已有半餘名連日藉
供分撥其未到後起之兵卽令總兵德音額酌
帶一二千名由長壽直赴萬縣會同艾如文相
機截剿此次各路打仗陣亡千總上官宗文王
之鎮把總楊兆德崔陞廖德美五員其餘傷亡
弁兵另行查明咨部

勒保又奏言查羅其清股匪屯踞孫家梁一帶

與冉文儔互相勾合匪黨較多每於清風寺白果壩等處分股出沒擾及儀隴運道經惠齡偵探賊蹤派副將關聯陞李紹祖叅將穆克登布挑帶弁兵由清風寺一路攻剿總兵朱射斗帶領兵勇從馬鞍場進發恒瑞撥兵屯紮磨盤寨一帶斷其折回孫家梁道路二十五日朱射斗帶兵進抵新寺場遇賊接仗適關聯陞等同時

趕到兩路截殺斃賊三四百名匪衆卽退屯青岡坪我兵連撲數次未能搶上陣亡守備趙成龍把總劉忠孝二員次日惠齡復派叅將穆克登布等帶領馬步各兵搶佔青岡坪對面山梁與賊對拒我兵鎗礮並發殲戮無數並擊殺執旗賊目二名餘匪卽從磨盤寨奔竄適恒瑞帶領官兵輪番邀擊賊匪兩面受敵傷斃甚多惟

恃路徑熟習乘夜紛紛潛逸把總任殿檠秦得
祿受傷陣亡現在惠齡移紮窩堂廟與朱射斗
合兵一處一俟儀隴後路肅清卽當會同恒瑞
設法進剿其陝省賊匪李全阮正通等竄入川
省南巴等境經臣飛飭各地方官實力堵禦嗣
據南江縣知縣裘良駿通江縣知縣徐廷鈺先
後稟報節次於各該縣境內禦賊接仗擒斃甚

冬並于通江所屬竹峪關一帶查有川省被裹
難民一千餘人均從漢陰乞食逃回經該令全
數招撫給發口糧妥爲安插其餘賊匪均在南
江通江蒼溪廣元各交界往來奔竄署廣元縣
知縣劉清亦督率鄉勇于百丈關一帶設法堵
截_臣查此起賊匪竄入川疆本欲與王三槐等
合夥現經各地方官分投截剿甚爲得力惟因

臣剿辦王三槐等一時不能分兵前往現又飛
咨宜綿囑令星撥官兵無分畛域趕緊追剿

同日英善福寧奏言川省大兵分剿各路賊匪
軍糧一項最關緊要查川省額貯常平等穀二
百八十二萬七千七百餘石除苗疆軍需碾運
過四十二萬六千三百七十餘石不計外自達
州軍興起至本年三月止共碾過穀一百七十

四萬三千五百餘石現在存穀如寧遠龍安雅
州荊州道路寫遠不能派碾其蕪州保寧順慶
等處或當賊衝或被賊擾剩穀無多難以派碾
目前竭力籌辦雖尙足供支但不可不先事預
籌現在王三槐等竄至大竹梁塾一帶羅其清
冉文儔尙在儀隴境內其林亮功龍紹周尙在
開縣一帶地方而陳崇德等亦尙在大寧老木

園拒守均經勒保等統兵分路圍剿並通飭附近州縣廣募鄉勇堵禦現又接據川北道李鉞漢興道文需稟稱漢中賊匪李全阮正通等已分股竄入川省想陝省大兵隨後亦卽躡剿來川而新調雲貴官兵一萬餘名亦皆陸續抵營川省兵勇驟添軍糧自應多備臣等再三籌畫惟甘肅秦階一帶尙有存糧運至畧陽下船由

水運直送廣元頗爲便捷前曾飛飭甘肅軍需局查撥去後茲接署甘肅藩司廣厚等覆稱甘省距畧陽較近之州縣如秦州成縣西和禮縣徽縣等處計可撥小麥十萬石已飛檄各州縣趕緊運交陝省委員接收轉運臣等查甘省存貯小麥既可分撥十萬石運川即可磨麵配搭供支兵食當卽飛咨陝省委員於畧陽接收轉

運川省並於川省派員由廣元縣接運至保寧
順慶存貯卽令於該三縣碾磨麥麵以便隨時
聽候調撥臣等仍督率承辦各員樽節辦理不
敢稍任糜費均奏入

上命軍機大臣傳諭勒保宜綿惠齡曰勒保奏官兵
連日分剿墊江梁山竄匪雖殲殺二千餘人而賊
匪仍向開萬交界奔竄至惠齡恒瑞等在清風寺

磨盤寨追剿賊匪殲獲無多致賊匪復向磨盤寨
竄逸儀隴後路仍未肅清且均未擒獲著名首逆

殊不滿意現在雲貴官兵已有五千餘名到營其

後起官兵勒保令由長壽直赴萬縣計日內早已

趕到又據英善等奏甘省已撥小麥十萬石運川

似此兵多糧足勒保當鼓勵新兵銳氣迅速兜擒

務將王三槐徐添德等首夥一鼓殲淨而惠齡恒

瑞等在儀隴一路亦應將後路早行肅清以便與
勒保併力合擊毋再遲緩干咎所有此次打仗陣
亡之守備趙成龍千總上官宗文王之鎮縣丞李
晨把總劉忠孝楊兆德崔陞廖德美任殿繁秦得
祿俱著咨部加等議卹至阮正通李全據勒保英
善等奏已由陝折竄南江巴州一帶勒保現因追
剿王三槐等正當喫緊勢難兼顧業經飛咨陝省

撥兵協剿宜綿等尤當督率勁旅將高均德一股
速行剿淨卽赴川境協剿卽使一時未能分身亦
應酌派將領帶兵先行赴川追剿不得以陝境竄
匪折四川省卽置之不顧竟以隣省爲壑也

二十三日 丙戌 宜綿德楞泰明亮奏言高均德李

全張添倫等三股賊匪由五卽分竄四畝地等

處其勢仍欲渡江 臣 明亮自兩河口趕至洋縣

城固一帶繞出賊前迎頭截擊臣德楞泰同賽

冲阿等分兵兩路於初一初二兩日在洋縣所

屬之茅坪華陽壩地方連次殺賊一千餘名生

擒三百餘名其時臣明亮帶兵已抵城固賊匪

不敢南竄遂由城固之小河口西奔褒城界內

查褒城西南百餘里卽抵長寨而長寨以西一

帶褒漢未經合流其水面淺狹之處竟可踰渡

若任賊匪竄渡漢江卽致進入川省不可不急

爲防備臣明亮於初四日同圖桑阿關騰長春

等帶兵趕抵長寨密爲布置賊匪已出南鄭天

台山偵知我兵有備遂折回西北逃竄連日大

雨各處溪河俱漲水五六尺不等賊復分爲數

十股四下竄渡約淹斃四五百人臣德楞泰率

領大隊繞出文川至五道梁另派阿哈保阿穆

勒塔等帶兵分路追截馬兵騎馬徑步兵卽
拽馬尾隨渡官兵踴躍爭先斬獲甚衆其一股
賊匪在虎跳岩約有四五百人遊擊張朋首先
奮勇衝入賊隊殲戮無遺又有賊匪一股竄至
燕子壩欲渡小河入馬道驛經索費英阿派守
備蘭福楊伏國帶兵二百名知縣汪銓帶領鄉
勇趕赴河岸堵禦殺賊一百餘人餘衆不能過

河俱向武關一帶分竄_臣宜綿前調柯藩帶兵

一千名自兩河關趕來長寨_臣明亮將防江一

切事宜交與柯藩卽於初八日帶原兵馳赴馬

道驛賊匪後隊正在鐵佛寺焚掠見官兵猝至

反身迎拒副將官信叅將達桑阿等督兵奮剿

殺賊三百餘人生擒劉文宗等四十七名又有

一股賊匪在武勝河淌渡並有折毀民房焚筏

者臣明亮馳至該處令官兵排列施放鎗礮並

向筏上轟打登時中傷落水及筏散淹沒者約

有七八百人廣東兵丁浮水生擒翟椿杖等九

十六名奪獲騾馬器械甚多其北竄之賊經秦

承恩王文雄帶兵搜捕無難淨盡其陸續竄入

武關之西溝者人數較多且路通沔縣黃沙等

處現有柯藩在長寨地方防守臣德楞泰明亮

亦帶兵分投囑擊伏柵高均德等數股賊匪所
餘不過六七千人然皆兇悍亡命之徒至李全
並未入川與高均德狼狽相依時或聚於一處

現在

臣

德楞泰自五道梁追擊

臣

明亮在黃沙

一帶迎截秦承恩王文雄亦帶兵自北而來四

面兜圍賊匪無從竄逸可冀於旬日之內擒拏

首逆再

臣

宜綿前據平利縣稟報川省老木關

賊匪竄至湯家壩距陝境平利安康邊界不遠
當派烏爾圖那遜道員溫承惠等帶兵赴各隘

口防堵

臣

宜綿亦督兵繼進行抵平利接據溫

承惠稟報老木園竄匪業經觀成劉君輔剿滅
淨盡其零星竄入陝境者俱經各卡隘盤獲正

法陝省邊界已無他虞

臣

宜綿卽於十一日仍

趕赴軍營合剿

同日秦承恩奏言

臣

與王文雄將盤屋山內竄

匪剿盡探聞高均德等大股已由洋縣竄至留

壩一帶查該處通連棧道爲川陝咽喉關係緊

要

臣

當與王文雄於初十日由駱峪關帶兵起

程馳赴寶雞入棧剿辦途次連接探報賊匪因

宜綿德楞泰等分股兜剿勢已窮蹙於初九日

竄至武關河又經主簿董邦寧帶領鄉勇截殺

二百餘人適大兵趕到兩面截擊殲戮甚多賊
卽由武關驛橫過棧道於十二三等曰竄至鳳
縣方石舖楊家店滋擾其地東連鳳縣西接兩
當查兩當界上現有副將李文蔚等帶兵防堵
自可退賊西竄之路惟方石舖楊家店一帶相
傳爲古棧道節年開墾路徑日多東北緊接寶
雞正北可通汧隴一出山口卽係平原兩路均

須嚴備

臣

與王文雄帶領兵勇現已馳至鳳縣

竇雞連界之黃牛舖扼住棧道東北要口確探

賊蹤相機迎剿一面撥兵馳往鳳縣截賊東竄

之路其隴州一帶已派知府崇祿馳往該處率

同地方官募勇設卡嚴密布置倘賊有北竄之

信

臣

等亦卽馳赴隴州抄出賊前迎擊

秦承恩又奏言前奉部撥陝省餉銀二百萬兩

臣

於接到後擢節動用近因各路官兵入陝會剿兼因賊匪擾及西安鳳翔漢中興安商州五府州境內添募鄉勇較前多至數倍並隨時賑卹難民及應還截留川餉所存無幾現在賊匪擾至鳳縣又應於汧隴一帶募勇堵禦需用更爲浩繁且漢中興安商州及西安鳳翔迤南各屬賊過之後小民耕作久荒糧價有增無減其

附近被賊各屬常社倉糧動碾過多自應亟爲

籌補陝省連歲豐登本年未經被賊之處夏收

均屬上稔似應乘此二麥登場之後卽在西安

鳳翔同州等屬完善地方廣爲收買俾有糧之

戶及時出糶銀錢得以流通而將來所買之糧

各就道里遠近分撥糧少之地旣可以充兵食

又可以濟民艱懇請

天恩再撥銀三百萬兩速行解陝以應急需

臣仍督

飭藩司等隨時稽察核實造銷均奏入

上命軍機大臣傳諭勒保宜綿德楞泰景安秦承恩
曰此次賊首高均德等欲由五郎南竄經宜綿等
督率官兵繞道截擊斃賊二千餘人所辦較爲振
作然賊匪仍向武關奔竄迄未拏獲首逆尙不愜
意其李全一股雖據稱並未入川仍與高均德互

爲狼狽但經此番截殺之後賊夥不過六七千人
現在德楞泰由東面追捕明亮柯藩由南面沿江
攔截宜綿亦自興安前來會剿其北面有秦承恩
與王文雄扼住棧道探蹤迎剿賊匪自無從竄逆
宜綿等務須倍加奮勉趁賊首竄聚一處之時四
面兜圍將高均德李全等速於旬日內擒獲肅清
陝境以便德楞泰明亮等速赴川省協剿至老木

園竄匪業經剿淨宜綿等已探知具奏何以未據
勒保奏及此股賊匪既經剿竣德齡觀成劉君輔
即可移師擇要堵剿此時雲貴官兵自己早經到
齊勒保等務須督率將士乘新兵銳氣相機馳擊
將王三槐等著名首逆悉數擒獲再將各股賊匪
一律殲除毋再遲延

上諭內閣曰現在陝省竄匪經官兵乘勝窮追大功

尅期告竣該省連歲豐登一切善後事宜無難從容籌辦着於內庫動撥銀二百萬兩照例解往備用

二十五日戊子景安額勒登保與肇高杞奏言賊

匪張漢潮等經臣等節次剿殺後東奔西竄仍

欲潛渡漢江臣額勒登保景安分兵兩路於初

十十一等日在百倉八大河一帶殲斃七百餘

人十三日綸布春帶領馬隊官兵趕到偵知賊

匪在南漳所屬之倒坐廟屯聚焚掠欲犯南漳

縣城臣等卽於是日發兵臣景安高杞同綸布

春廣福孫清元等由南漳左面進擊臣額勒登

保興肇巴圖魯侍衛豐紳格布舍楊遇春等由

南漳右面進擊維時賊匪直趨縣城相距祇五

六里兩路官兵奮勇馳擊斃賊不下一千餘人

該處俱係水田溝坎高下賊匪人馬陷於泥淖
被獲者亦復不少餘賊遂向穀城縣一路逃遁
訊據獲賊供稱該匪等欲由磁河一帶直奔江
岸搶船渡江特留騎馬持械及好桿子手在章
村棚等處與官兵捨死抵禦設伏斷路等情

臣

等查磁河一帶江之南岸船隻久經撇盡賊匪
無從搶渡惟章村棚一帶山勢散漫路徑叢雜

賊情狡獪百出必須分佈擊剿方可集事隨將

現有官兵分爲四路臣額勒登保帶領巴圖魯

侍衛吉林河南廣西官兵爲一路臣景安同綸

布春帶領索倫湖南官兵爲一路臣興肇帶領

荊州滿兵及山東官兵爲一路臣高杞同署鎮

臣多爾濟扎普帶領湖北官兵爲一路十五日

二鼓發兵十六日巳刻行近章村棚賊匪蟻聚

各山人數甚衆見官兵猝至竟敢直前攻撲

額勒登保令協領德明泰等率兵首先衝出馬上鎗箭齊發連斃賊衆賊中桿子手仍復擁上

臣

額勒登保復飭豐紳格布舍楊遇春孫清元

等帶兵抄擊攪殺一處賊匪始行折回我兵乘勢追殺屍橫山麓又有一股賊匪從左手突出

適

臣

景安綸布春帶兵已到綸布春烏爾呼諾

等馳馬帶兵衝入賊隊斬戮甚多賊匪漫山奔竄查該處西北一帶樹木叢密臣等慮有埋伏

先經密行咨會

臣

興肇高杞於山後探明再行

出擊賊匪知我兵已向前追卽於箐林中吶喊

而下意欲抄截後路

臣

興肇高杞督兵於山後

橫出馳擊賊匪猝不及防亡命奔竄我兵四面

會集又殺賊二千餘人下有小南河一道賊匪

俱於灘淺處晒水而過有官兵鎗箭逼人深處隨水漂沒官兵盡力勦殺已及一晝夜暫行駐營統計節次殺賊五千餘人各營生擒賊匪九百一十三名當交隨營道員依精阿同知周季堂等審訊內有頭目張士爵王洪林等九名其餘俱係久經從逆之犯當經分別凌遲正法又有趙典等二百五十三名實係附近居民被

賊裹脅未久概行釋放歸業奪獲大小礮九個
鳥鎗旗桿刀矛五百九十餘件藍翎把總黃耀
奎奮勇殺賊身被矛傷陣亡其餘兵勇間有傷
亡容另行造冊咨部此時賊蹤已向西奔勢將
遁入鄖陽查鄖屬之房縣二竹均與川陝交界
綿長一千餘里究難四路合圍臣等已飛咨勒
保秦承恩派撥兵勇在於川陝邊界嚴行把守

如遇賊匪竄至即可與楚省官兵前後夾攻迅
速蒞事再襄陽一帶從前多有招撫投誠之人
現經賊匪竄擾恐復有勾結情事必須妥爲彈
壓且襄陽下游一帶俱就廓清被擾難民急宜
安撫而軍需一切正當追剿喫緊之際亦需大
員督辦臣高杞卽赴襄陽駐劄防範以重地方
此次各將弁以少擊多無不踴躍爭先倍常奮

勉謹將出力最著之人開單進呈可否量加獎
賞之處出自

天恩奏入

上命軍機大臣傳諭勒保景安曰此次景安等在穀
城章村棚一帶分路截擊前後殲賊五千餘人而
首逆仍向西竄未經拏獲雖據稱兵力較單但綸
布春所帶馬隊官兵業已趕到自當得力賊匪究

係烏合之衆且屢經截殺勢已潰敗景安等務須
設法截擊將賊首劉成棟張漢潮速行擒獲剿盡
餘匪勿令竄入鄖陽一帶又致蔓延所有打仗陣
亡之把總黃耀奎著咨部加等議卹其襄陽地方
前此招撫投誠之人甚多高杞到襄後自應留心
防範毋致復有勾結以期賊黨聞風解散方爲妥

善

上諭內閣曰景安等奏官兵在穀城一帶殲斃賊匪
數千帶兵官弁實爲奮勇所有三等侍衛噶拉著
賞給吉拉通阿巴圖魯名號吉林協領德明泰著
賞給騰起楚克巴圖魯名號黑龍江驍騎校伯勒
亨保著賞給阿克丹巴圖魯名號黑龍江驍騎校
史津保湖北遊擊王愷湖南遊擊胡定太貴州守
備楊芳俱著賞戴花翎吉林領催赫林保德明甲

兵德成黑龍江領催盟庫圖甲兵遜都爾海荊州
前鋒尙達廣西千總蘇明四川外委馬萬清湖南
外委李廷珍河南外委陳萬陞馬兵吳大用吳會
元山東外委何晏清俱著賞戴藍翎吉林降調協
領烏德隨營剿賊尙爲奮勉出力著加恩准其開
復俟有缺出補用以示鼓勵

二十七日

庚寅

署甘肅布政使廣厚奏言

臣

接據

兩當縣稟報陝省賊匪由鳳縣闖入該縣之楊
家店地方先有騎馬賊數十人經該處守卡兵
勇擊退旋有賊衆七八千人蜂擁前來該兵勇
等勢恐不能抵禦

臣

查兩當徽縣與陝省鳳縣

處處可通昨據該二縣稟報賊匪竄至鳳縣地
方卽恐其闖入甘境富於白馬關防守兵丁內
抽調兵四百名又原留兩當兵五百名交與駐

守該處副將李文蔚一併帶領探明賊蹤堵剿
該副將接到此信正可迎頭截殺惟賊數衆多
兵力尙單且不可無大員督率

臣

飛咨署河州

鎮臣吉蘭泰帶領鎮標及馬營監兵一千名就

近馳赴兩當一帶相機堵剿一面飛調附近之

涼州鎮兵五百名

臣

親身帶領馳往策應并知

會陝省領兵大員兩面夾擊務期迅速殲除奏

上命軍機大臣傳諭勒保宜綿德楞泰秦承恩曰陝
省賊匪由鳳縣竄至楊家店地方距兩當甚近昨
據秦承恩奏有副將李文蔚帶兵防堵今廣厚又
飛咨吉蘭泰馳往迎剿廣厚亦帶兵隨後策應自
可遏其西竄之路但宜綿等前稱旬日之內可擒
首逆自當合力兜圍何以又任闌入甘境實屬無

能無恥宜綿德楞泰承恩明亮均著傳旨嚴行
申飭現在兩當地方有吉蘭泰廣厚等帶兵堵截
宜綿等尤當奮勇直前兩面夾擊將高均德李全
等尅期擒獲以便德楞泰明亮赴川協剿若再遲
延貽誤復任賊匪蔓延滋擾必將宜綿等從重治
罪更不能曲爲寬貸也

二十八日

辛卯

勒保奏言王三槐等股賊匪自經

臣

分兵節次在梁山邊界痛加截剿惟該匪等恃其路徑熟悉輾轉奔竄狡詐異常初七八等日七十五等帶兵從李家寺一路進發行抵雞公嶺地方遇賊接仗殺斃數百名餘匪旋即紛竄七十五跟蹤進擊適富成所剿賊匪復奔至水磨河乾壩子等處與七十五所剿之賊紛紛竄聚人數較多當經臣飛飭富成七十五兩路

官兵趕緊夾擊並派雲貴新到官兵由百家場
進發該匪等見各路俱有官兵不敢抗拒均從
山溝小路奔竄我兵節次於觀音岩陳家梁馮
家壩等處痛加截擊斃賊不下二千餘人沿途
遺棄婦女幼孩無數其瑩江忠州邊界甫經被
擄民人乘間逸出者甚衆我兵正在分投剿捕
賊匪復分兩股一由拔山寺折回鄧都之大河

壩一由孫家壩繞過分水嶺當卽研訊獲賊張
遠宣等據供折回鄆都之賊係徐添德樊人傑
一股其遶過分水嶺之賊係王三槐冷添祿大
概要往開縣新寧一帶

臣

查明與百祥等追剿

王光祖股匪先由分水嶺前進節經在鐵索橋
地方遇賊接仗殲戮甚多該匪等卽在巫山坎
陳家場等處暫紮茲據獲賊供稱王三槐等一

股復從分水嶺繞道而去自必與王光祖合夥

正應趕緊布置臣隨飭富成七十五帶兵向鄧

都一路剿辦徐添德等竄匪一面知會明興百

祥卽由鐵索橋進剿臣一面督兵由仁市舖進

發十一日馳赴鷺鷥場探報明興百祥追剿巫

山坎等處賊匪直至青岡嶺該處樹林茂密山

勢極高賊衆先已佔踞我兵向上仰攻鎗礮並

發賊匪均於樹林內閃爍躲避自辰至未我兵
愈攻愈力斃賊七八百名賊匪旋退明興百祥
督兵搶上山梁因時已薄暮卽在該處拏卡將
及初更復有賊匪從青岡嶺潛來撲卡明興百
祥各領兵出卡迎敵詎賊愍不畏死向前力撲
明興右膀右腿俱帶矛傷仍指揮兵勇鎗擊箭
射斃賊無數餘匪始行潰散臣進抵仁市舖適

賊匪從青岡嶺逃竄前來

臣

督率將領兵勇乘

勢追擊二十餘里斃賊三百餘名生擒楊廷光

等七十三名大夥匪衆因見官兵驟至均由新

寧之南嶽場龍王塘一帶竄逸

臣

現飭百祥整

頓兵力暫於臨江市駐劄以杜開縣要路並派

富爾賽帶領兵勇由楊柳關進發以防分擾東

鄉新寧

臣

督率大隊取道豆山關察探該首逆

等現由何路逃竄卽由何路分兵兜截至明興受傷之處尙不甚重現囑於新寧調治其餘各路傷亡弁兵另行查明咨部

勒保又奏言

臣

接據觀成劉君輔呈報四月二

十三四等日官兵由三道埡進攻老木園賊巢焚其外圍木城賊匪施放滾木墻石抗拒愈力二十五日我兵屢次搶上山頂均因鎗石如雨

製三省刑匪方豎編卷七十三

擊賊又折回水墩子山梁恃險竄匿官兵四面
圍圍該匪等抵死抗拒五月初三日呂朝龍首
先搶上山梁各路兵勇攀援競上匪衆無路可
奔殲戮殆盡首逆陳崇德自用矛鎗戳傷心坎
斃命經拏獲賊目尤國安蕭月旦並陳崇德堂
兄陳紀何等認明屍身屬實割取首級梟示並
將現獲各犯一一寸磔防禦崇喜守備虎正林

千總劉忠魁袁天倫李如桂把總達貫魁等六員均因打仗殺賊受傷其餘傷亡弁兵另行查明咨部等因臣查觀成等剿辦老木園賊匪日久未能蕝功奉

旨革職令其帶兵贖罪茲連日奮勇趕剿冒雨攻圍已將此股賊匪全數撲滅具見感愧奮興用敢據實陳奏臣現以王三槐等股賊匪又從開縣

新寧交界分竄卽經飛調觀成劉君輔帶領原
兵就近由溫湯井一帶堵截於目前軍務極爲
有裨其前次派往老木園幫同剿賊之總兵德
齡查大寧境內梨兒壩地方尙有從前鐵瓦寺
一股剿散餘匪在彼潛匿應令該鎮卽留該處
酌帶兵勇搜剿以期地方早臻寧靖均奏入

上命軍機大臣傳諭勒保以勒保奏分兵剿辦王三

槐等股賊匪雖在青岡嶺等處前後擊斃三千餘人賊匪仍向開縣新寧奔竄並未拏獲首逆一人其老木園賊匪經觀成等剿洗淨盡昨已據宜綿等探報勒保此時始行馳奏亦屬遲緩觀成劉君輔攻剿此股將閱兩年始行辦竣不足爲功惟能於德齡未到之前自知愧勵已將賊巢攻克尙爲奮勉觀成劉君輔俱著加恩賞給頭等待衛職銜

仍各賞大小荷包並著勒保留心察看伊二人此時帶兵如果始終奮勇遇有總兵副將缺出酌量奏署明興打仗受傷亦屬奮勉著加恩授爲頭等侍衛所受矛傷如未調治平復卽令緩程來京若傷不甚重自當仍留該處帶兵以資得力其打仗殺賊之叅將呂朝龍並受傷之守備虎正林等亦著轉詢觀成等查明實在出力者遇有相當缺出

酌量陞授以示鼓勵現在勒保處又多出一路兵力務須趁賊匪敗竄之時分投兜剿將王三槐徐添德冉文儔羅其清等速行擒獲至總兵德齡又經勒保令在大寧一帶搜剿竄匪德齡務速行辦淨以便移師擇要堵禦毋稍遲緩